



Senin, 27 September 2021
Ogen: 2 Raja-raja 5:11-15



Empeteruk Ukur Erbahanca Malem



Puanglima Naaman eme sekalak tentera si meganjang pangkatna i bas negri Siria, negri si mbelin ras bayak. Ia kalak si mbisa, tentu mbue kalak mehangke man bana. Sada paksa turah pinakitna, eme pinakit kulit si la tertambari i bas kutana. Selaku kalak si terpandang tapi lit pinakit si erbahanca mela, dengen nuhsahi Naaman. Lit sekalak juak-juakna singuda-nguda eme kesusuren bangsa Israel, itandaina sekalak nabi i negrina si dem alu kuasa Tuhan. Emaka isuruhna tuanna ndai ku Israel ndahi ras gelah ipejumpaana ras nabi Elisa. Enggo mbue kepe perlengkapen, duit ras barang-barang ibabana, sabap iakapna maka ugapa pe ia itambari alu sikap kal, menurut standart kerajan.

Singkatna enggo ipejumpaken ia ras Elisa, nabi Tuhan e. Arah suruh-suruhenna Nabi Elisa nuruh Naaman gelah ridi i Lau Jordan. Lau Jordan e, melket, ise pe megati ercebah-cebah je. Ugalah nina Puanglima Naaman, ia sekalak Puanglima isuruh ridi bas tapin kuta. Emaka tantangna la ia nggit, tapi kenca ipersingeti juak-juakna ia, ipeterukna ukurna, patuh ia nandangi perkatan nabi, asa pitu kali igedapkenna bana, malem pinakitna ndai janah nggo mejile ngulih. Meriah kal ukurna.

Mawen Tuhan ngijinken kita ngenanami sada situasi sulit, ntah pinakit ntah lingkungan si sulit. Situhuna latih kal si akap ngalaken situasi geluh e, tapi bagi pengalaman Puanglima Naaman. Cara Tuhan erdahin mawen labo arah hal-hal dahsyat entah mbelin. Banci jadi senta e pe lanai lako man pertambar, lanai lako muat teman. Tapi si jadi dalam kepulahenta eme kepatuhen ras ketaatenta. Lit sekalak Mamre malem arah pinakit Tiroid nari, alu ertoto ras rutin selama 17 tahun minem tambar la pernah elat. Emaka labo perlu pemersik ukurta, meteruklah rukur maka malem kerina si mesuinta.